

MOCIÓN DO GRUPO MUNICIPAL DE AER, PARA PROMOVER UNHA DECLARACIÓN INSTITUCIONAL DO CONCELLO, DE REXEITAMENTO DA FUMIGACIÓN AÉREA CON CASCADE POR PARTE DE ASPAPEL, COA AVALIACIÓN DA XUNTA, PARA O CONTROL DO GONÍPTERO DO EUCALIPTO.

PLENO 12 XULLO 2012. ACTA 12/2012

ANTECEDENTES.-

Moción do Grupo Municipal de A.E.R., presentada no Rexistro Xeral do Concello, con data 20 de xullo de 2012, que transcrita dí:

“Jorge Varela Couñago, concelleiro da Agrupación de Electores de Redondela, en base ao artigo 19 do Regulamento Orgánico do Concello de Redondela e ao artigo 97 do Regulamento de Organización, Funcionamento e Réxime Xurídico das Entidades Locais, recollendo unha iniciativa da Plataforma Contra as Fumigacións, presenta a seguinte MOCIÓN, pra o seu debate, e no seu caso, aprobación no vindeiro Pleno Ordinario.

EXPOSICIÓN DE MOTIVOS

Visto que dende comezos do mes de abril algúns propietarios de montes particulares e Comunidades de Montes Veciñais en Man Común veñen recibindo, os primeiros desde as súas PROMAS e as segundas directamente polo persoal da Consellería de Medio Rural, comunicacións instando a autorizar a fumigación aérea dos seus montes de eucalipto co produto Cascade.

Visto que nesas comunicacións infórmase de que as fumigacións son gratuítas, pola conta de ASPAPEL (organización das papeleiras), que van avaladas pola Xunta de Galiza e que o Cascade é inofensivo para as persoas e animais, con pouco perigo para as abellas e insectos voadores.

Visto que a normativa europea vixente contradí o mantido nas devanditas comunicacións nos seguintes termos:

- *DECISIÓN DA COMISIÓN de 9 de febreiro de 2012 relativa á non inclusión do flufenoxurón para o tipo de produto 18 nos anexos I, IA ou IB da Directiva 98/8/CE do Parlamento Europeo e do Consello, relativa á comercialización de biocidas (2012/77/UE):*

- *apartado (5): a avaliación de riscos para os compartimentos ambientais obxecto de estudo, levada a cabo cun plantexamento realista, demostrou efectos inadmisíbeis para o compartimento acuático. Ademais, as características do flufenoxurón fano persistente, bioacumulable e tóxico, así como moi persistente e moi bioacumulable, de conformidade cos criterios establecidos no anexo XIII do Regulamento (CE) nº 1907/2006 do Parlamento Europeo*

e do Consello. Por conseguinte, non procede incluír nos anexos I, IA o IB da Directiva 98/8/CE o flufenoxurón para o seu uso no tipo de produto 18.

- artigo 1: o flufenoxurón (nº CAS 101463-69-8; nº CE 417-680-3) non se incluír nos anexos I, IA ou IB da Directiva 98/8/CE para o tipo de produto 18.

- artigo 2: aos efectos do artigo 4, apartado 2, do Regulamento (CE) nº 1451/2007, os biocidas do tipo de produto 18 que conteñan flufenoxurón deixarán de comercializarse con efectos a partir do 1 de agosto do 2012.

- DIRECTIVA 2009/128/CE DO PARLAMENTO EUROPEO E DO CONSELLO do 21 de Outubro de 2009 pola que se establece o marco da actuación comunitaria para conseguir un uso sostible dos praguicidas:

- artigo 9: Pulverización aérea, apartado 1: os Estados membros garantirán a prohibición das pulverizacións aéreas.

Considerando que dacordo co aquí exposto as fumigacións aéreas con flufenoxurón, tanto polo produto como polo método empregado, vulneran dobremente o actual marco xurídico europeo.

Considerando que a toxicidade do flufenoxurón non afecta só ao gorgollo, senón tamén aos insectos polinizadores como as abellas (coas consecuencias que isto carrearía para a agricultura) e o propio *Anaphes nitens* (o parasito empregado para o control biolóxico do gorgollo).

Considerando que os efectos na agricultura poden ser especialmente prexudiciais para a agricultura ecolóxica, xa que debido a persistencia do flufenoxurón poderá dar positivo nas análises do chan durante anos.

Considerando que segundo a UE se teñen demostrado os efectos inadmisibles para os ecosistemas acuáticos, polo que afectará gravemente aos nosos recursos pesqueiros e á riqueza das nosas brañas protexidas (LICs).

Considerando que por todo o aquí exposto unha eventual fumigación aérea nalgún punto do noso concello podería afectar a todo o ámbito municipal, a través da dispersión aérea ou polas augas.

Considerando que é moi bioacumulable, polo que no curto prazo supón un risco para toda a cadea trófica ate chegar aos nosos veciños, non tendo sido os seus efectos na saúde desbotados pola UE.

A Agrupación de Electores de Redondela propón ao pleno a adopción dos seguintes acordos:

Primeiro.- Non permitir as fumigacións aéreas con CASCADE no seu termo municipal.

Segundo. - Instar á Xunta a que non autorice as fumigacións con CASCADE previstas por ASPAPEL.

Terceiro. Estudar as medidas pertinentes para fomentar a nivel municipal unha xestión forestal sostible, que respecte o entorno e a saúde das persoas.”

VOTACIÓN E ACORDO

Sometido o asunto a votación, o Concello Pleno, en votación ordinaria e por maioría dos/as Sres./as concelleiros/as, sendo once votos a favor (8 do PSdeG-PSOE, 2 do B.N.G. E 1 de A.E.R.) e dez votos en contra (10 do PP), aprobou, nos seus propios termos, a Moción do Grupo Municipal de A.E.R., nos antecedentes transcrita, coas enmendas formuladas polo grupo municipal do B.N.G. referidas á modificación do texto do parágrafo quinto do folio 2 da Moción, que quedará redactado do seguinte xeito:

Considerando que según a UE se teñen demostrados os efectos inadmisibles para os ecosistemas acuáticos, polo que afectará gravemente ao LIC, Ensenada San Simón, Rede Natura 2000.

E a adición do seguinte punto á parte dispositiva da Moción:

Cuarto.- Que a Concellería de Medio Ambiente se dirixirá aos propietarios de montes co acordo plenario para que non colaboren en ditas fumigacións.